

**Uunga siunnersuut: Tuniniaanissamik nittarsaassisarneq aamma
nalunaaqutsersuisarneq pillugu Inatsisartut Inatsisaata allanngortinnissaa pillugu
Inatsisartut inatsisaat nr. xx, xx. xxx 2020-meersoq.**

Inuussutissarsiornermut Aatsitassanullu Naalakkersuisumit saqqummiunneqartoq

pillugu

Inuussutissarsiornermut Aatsitassanullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap sularinninnermini inuttarai:

Inatsisartunut ilaasortaq Henrik Fleischer, Siumut, Siulittaasoq
Inatsisartunut ilaasortaq Sofia Geisler, Inuit Ataqtigiit, Siulittaasup tullia
Inatsisartunut ilaasortaq Hermann Berthelsen, Siumut
Inatsisartunut ilaasortaq Rachel H. Ingemann, Demokraatit
Inatsisartunut ilaasortaq Bo Martinsen, Demokraatit
Inatsisartunut ilaasortaq Aqqalu Jerimiassen, Atassut
Inatsisartunut ilaasortaq Tillie Martinussen, Suleqatigiissitsisut

UKA20-mi ulloq 1. oktober 2020-mi siullermeerinninnerup kingorna siunnersuut
ataatsimiititaliamit misissorneqarpoq.

Siunnersuutip imarisai siunertaalu

Tuniniaanermut aamma assigiinnik nioqutissanik akeqartitsinernut paasissutissat –
elektroniskiusumik nioqutissanik neqeroortarnermut tunngatillugu aamma akinut tunngasunik
paasissutissiisussaaitaanerup atuunera siunnersuutikkut erseqqissaatigineqarpoq.

Kiffartuussinernik suliiani akusut aamma kiffartuussinerni paasissutissat fakturami
nalunaarneqartussat – Naalakkersuisut maannamut akinut tunngasunik paasissutissiisarnermut
malittarisassanik nalunaarutikkoorlugu aalajangersaasinnaatitaasimapput. Piginnaatitaaffik
taanna atorneqarsimangilaq. Kiffartuussinernut akit pillugit paasissutissiisarnermut
malittarisassanik taamaattunik siunnersuutikkut aalajangersaasoqarpoq. Taamatuttaaq

akiligassiissuteqarfiusussatut sulianut fakturaliornissamut pisussaaffik siunnersuutikkut eqqunneqarpoq.

Naalackersuisut malittarisassanik immikkut ittunik aalajangersaasinnaanermut siunnersuutikkut piginnaatinneqarput, tassani aamma atuisartunut inuussutissarsiortunullu tunngatillugu pingaarutilinnik isiginiagassaqaartillugu piumasaqaatinik aalajangersarneqarsimasunik atuutsitsinnginnissamut.

Akitsuutininik allanguineq kiisalu akitsuutininik siumoortuminik ilisimatitsisarneq – Siunnersuutikkut akitsuutininik pioreersunik allannguisarnermut imaluunniit isumaqatigiissutaasunik atsiukkani ingerlaavartuni akitsuutininik nutaanik eqqussisinnanermut erseqqinnerusunik malittarisassiuussisoqarpoq.

Atuisartoqarnermut Unammilleqatigiinnermullu Aqutsisoqarfiup nakkutilliinikkut pisussaaffii – Atuisartoqarnermut Unammilleqatigiinnermullu Aqutsisoqarfiup nakkutilliinera siunnersuutikkut Naalackersuisunut pituttorsimajunnaartinneqarpoq. Pituttorsimasuunnginneq taanna siusinnerusukkat Atuisartoqarnermut Siunnersuisoqatigiit, tuniniaanissamik nittarsaassisarneq pillugu inatsisip maanna atuuttup 2015-imi eqqunneqarneratigut atorunnaarsinneqartut aqqutigalugit qulakkeerneqarsimagaluarpoq.

Inuussutissarsiortut niuerfiup ammanerani Atuisartoqarnermut Unammilleqatigiinnermullu Aqutsisoqarfimmik isitsaaliullutik nittarsaassisarnermut inatsisit naapertorlugit nakkutilliinermik atuutsitsinaveersaarsinnaangitsut siunnersuutikkut aalajangersarneqarpoq.

Siunnersuutip Inatsisartuni siullermeerneqarnera

Siullermeerinninnermi siunnersuut taparserneqarluarpoq. Inuussutissarsiutini assigiinngitsuni tuniniaanermut atatillugu paasissutissat saqqummiunneqartussat imarisaannut tunngatillugu piumasaqaatit assigiinngitsuusinnaanerat eqqarsaatigalugu malittarisassat naammattumik eqaassuseqartariaqartut oqaatigineqarpoq.

Tusarniaaneq

Siunnersuut piffissami 26. november 2019-imit 27. december 2019-imut tusarniaassutigineqarsimavoq. Peqatigitillugu siunnersuut piffissami tassani Namminersorlutik Oqartussat tusarniaanermut nittartagaanni saqqumitinneqarsimavoq.

Tusarniaaneq pillugu ataatsimiititaliaq allanik oqaaseqaatissaqanngilaq.

Ataatsimiititaliap inatsisissatut siunnersuummik suliarinninnera

Siunnersuutip siullermeerinninnermi taparserluarneqarnera ataatsimiititaliamit maluginiarneqarpoq. Naalackersuisut nalunaarutininik suliaqarnermikkut inuussutissarsiutinut

immikkuullarissunik sammivilinnut naleqqussaasinnaaneranik siunnersuummi §17, imm. 9 qulakkeerinnittoq ataatsimiititaliamit maluginiarneqarpoq. Taamaalilluni – atuisunut inuussutissarsiortunullu – sinaakktissanik pitsaasunik pilersitsinissamik inatsisikkut siunertaq anguneqarsinnaassaaq.

Inuussutissarsiutini immikkuullarissuni aalajangersimasuni paasissutissiisarnermut nalunaaqutsersuisarnermullu immikkut pisariaqartinneqarsinnaasunut malittarisassat sapinngisamik naleqqussarneqarnissaat qulakkeerniarlugu Naalakkersuisut nalunaarutitik ilusilersuinerminni atuisunik inuussutissarsiortunillu attuumassutilinnik tusarniaasarnermikkut akuutitsisarnissaat ataatsimiititaliamit naatsorsuutigineqarlunnarpoq.

Siunnersuutip aningaasaqarnikkut kingunissai

Siunnersuut pisortanut malunnaatilimmik kinguneqarnaviannngitsutut naatsorsuutigineqartoq siunnersuummut nassuiaatini paasissutissiissutigineqarpoq.

Inuussutissiortunut akinut tunngassutillit pillugit paasissutissiissutitut atortussanik ilusilersuinermut nutarterinernullu kiisalu pinngitsoorani fakturamik suliaqartarnermut aningaasartuuteqartoqassaaq. Periaaseq ullumikkut ilisimaneqarluareersoq annertuumillu atorneqareersoq pineqarmat aningaasartuutit taakku killeqartussatut Naalakkersuisunit nalilerneqarput.

Aammattaaq akitsuutinut tunngatillugu atugassiissutitik allannguineranut annikitsunik aningaasartuuteqartoqassaaq. Tamatumani aningaasaqarnikkut allaffissornikkullu nammakkersuutit annikitsuararsuusussatut Naalakkersuisunit nalilerneqarput, tassami isumaqatigiissutinut ingerlareersunut akitsuutinik allannguineranut ersarissumik isumaqatigiissuteqarnissamut inatsisitigut tunngavissaqartussaatisoqareemat.

Ataatsimiititaliap inassuteqaatai

Siunnersuut **akuersissutigineqassasoq** **ataatsimiititaliamit** **isumaqatigiittumit** inassutigineqarpoq

Ataatsimiititaliap taamatut oqaaseqaateqarluni isumaliutissiisummilu allassimaneratut paasinnilluni siunnersuut aappassaaniigassanngortippaa.

Henrik Fleischer
Siulittaasoq

Sofia Geisler
Siulittaasup tullia

Hermann Berthelsen

Rachel H. Ingemann

Bo Martinsen

Aqqalu Jerimiassen

Tillie Martinussen